

Mazarin  
3188

La Relation veritable

RARE BOOK  
COLLECTION



THE LIBRARY OF THE  
UNIVERSITY OF  
NORTH CAROLINA  
AT  
CHAPEL HILL

Mazarin  
3188

UNIVERSITY OF N.C. AT CHAPEL HILL



00023009218



LA  
RELATION  
VERITABLE,

Contenant le grand combat donné  
entre les troupes de Son Altesse  
Royale , & celles du C. M.  
à l'attaque d'Estampes.



1672

A P A R I S,  
Chez JEAN BRUNET, rue Sainte Anne.

---

M. DC. LII.



RELATION

VERITABLE

Contenant le grand combat donné  
entre les troupes de Son Altesse  
Royale, & celles du C. M.  
à l'attaque d'Estampes.



1672

A PARIS,  
Chez Jean BAYNET, the 21<sup>e</sup> de la rue de la Harpe.  
M. DC. LII.



La Relation veritable, contenant le grand combat donné entre les troupes de Son Altesse Royale, & celles du C. Mazarin à l'attaque d'Estampes.



E croyez pas que ie vous donne icy la Relation de ce dernier combat pour vous diuertir: car ie sçay qu'il y en a beaucoup qui lisent avec grande ioye la mort de leurs compatriotes, sous ombre qu'ils ne sont pas du party de leur inclination, & le siecle d'aujourd'huy est devenu si barbare, que le François traite le François de Turc à Maure, sans sçauoir bonnement la veritable cause de cette animosité; ceux qui sont veritablement zelez pour le Roy, pleignent avec iustice tous ceux des deux partis, que le mal-heur de la guerre fait perir, avec moins de gloire que d'aveuglement; & c'est de cette façon que ie vous veux faire part de ce qui s'est passé à Estampes entre les deux armées.



Nous auons icy appris par le retour de Mademoiselle, comme le Marechal de Turenne auoit paru avec deux mille hommes pres d'Estampes, alors que Son Altesse voulut voir mettre l'armée des Princes en bataille, dequoy estant auertie elle se mit sur ses gardes, & cependant elle poursuiuit tousiours sa route vers Paris, où elle est arriuée comme vous sçauiez.

Il est depuis venu vn Courrier de ladite armée de Son Altesse Royale, qui a rapporté qu'il s'estoit donné combat, & que le Marechal de Turenne ayant esté apperceu auoit feint de se retirer, & puis auroit attaqué Estampes par le Faux-bourg du costé d'Orleans, y estant entré à la faueur de quelques colines & bois qui sont audit lieu: Il y eut vn rude combat, les ennemis ayant desia gagné vne partie du Fauxbourg par la surprise qu'ils firent aux Allemans, qui estoient postez de ce costé-là, mais nos gens en estans aduertis accoururent promptement, & les chargerent avec tant d'impetuosité & de chaleur, qu'ils les en chasserent avec plus de promptitude qu'ils n'y estoient entrez: ce ne fut pas neantmoins sans beaucoup de perte de part & d'autre, mais il est tres-constant, & ledit Courrier nous assure que les Mazarins y ont esté tres-maltraitez, & particulièrement le Regiment de Picardie, dont on fait estat qu'il y a deux cens prisonniers; celuy de la Marine & de Nauailles n'en ont



ont gueres eu meilleur marché, tant y a que l'on fait estime de huiet cens morts sur la place, tant de part que d'autre, dont il y en a plus de cinq des leur, le combat ayant duré long-temps & fort opiniastré de part & d'autre. Mais enfin ayant esté, comme i'ay dit, chassés avec grande perte, c'est vne marque asseurée que l'aduantage est demeuré du costé des Princes.

Il y a de braues gens de tuez & blesez, de part & d'autre, & entr'autres les sieur de Clinchamp, commandât lesdites troupes a esté blese, mais legerement, le Colonel Brouc y a esté tué, que les Allemans regrettent beaucoup & dont Monsieur le Prince a tesmoigné bien du ressentiment, estant vn des braues hommes de son armée, le sieur de Rubel Capitaine dans le Regiment de son Altesse & fils de Monsieur le Preuost des Marchands y a esté tué, ayant donné beaucoup de marques de sa valeur, & le sieur de Briolle Marechal de Camp prisonnier. Du costé de l'armée des Mazarins on regrette fort le sieur de Bougy qui y a aussi esté tué, & le sieur de Beaujeu avec quelques autres de marque, dont on ne sçait pas encore les noms, & que nous apprendrons par le premier Courier. Je croy que c'est le bruit de la venue du Duc de Lorraine qui iette l'armée du Marechal de Turenne dans l'impatience de se battre, preuoyant bien qu'ils n'en auront pas si bon marché quand ses troupes seront venues: mais l'armée de Mes-



seurs les Princes se tient tousiours sur ses gardes, n'ayant point ordre de combattre qu'en cas qu'on les attaque.

Les Regimens de Son Altesse & celuy de Languedoc ont esté ceux qui ont soustenu vigoureusement l'attaque, & ont esté soustenus vaillamment des troupes dudit sieur de Clinchamp.

Quand à nos Messieurs de l'armée du Maréchal de Turenne, ie croy que les mains ne leur demangeront plus tant, car on leur en a tiré les cirons assez rudement, il faut qu'ils vivent en patience malgré qu'ils en ayent, & bien leur en a pris que Monsieur le Prince n'y estoit pas, ce n'est pas qu'il ne se soit perdu beaucoup de gens de part & d'autre, qui sont veritablement à regretter, & pour moy ie croy que les François sont enforcellez par vn charme bien puissant d'estre si acharnez à se deffaire les vns les autres, Dieu en connoist les auteurs, qu'il ne laissera pas sans doute impunis: la cause de cet aueuglement est que l'un croit seruir sa patrie & l'autre son Roy: mais il semble qu'un Prince & l'Estat ou le public ont des liaisons si estroittes qu'on ne scauroit seruir l'un sans l'autre, il faut qu'il y ayt quelque diable pour en auoir fait la separation; c'est le Cardinal seul qui a esté capable de deffaire vne si sainte Vnion, puis que pour attirer le Roy à son interest particulier il l'a fait detacher de celuy du public, & a tellement meslé le sien avec celuy



de sa Majesté, qu'il semble qu'on ne peut plus  
servir le Roy sans servir le Cardinal Mazarin; &  
les Officiers de l'armée du Roy, dont les plus  
zelez qui pestent contre ce Ministre, luy rendent  
des services tres-considerables en executant pon-  
ctuellement les ordres de sa Majesté, puis qu'ils  
sont sortis auparavant de la bouche & de la teste  
de ce maudit enchanteur, en verité ces pauvres  
aveugles sont à pleindre, encore s'il s'en trouvoit  
quelqu'un d'entr'eux qui dit au Roy, **SIRE**,  
encore que nous servions vostre Majesté avec  
tout le zele que nous sommes obligez d'avoir, &  
que nous hazardions nostre vie si librement,  
neantmoins il semble que nos services vous  
soient tout à fait vains & inutiles, cela ne faisant  
qu'aigrir vos peuples: d'avantage on nous repro-  
che tout haut que nous ne servons point vostre  
Majesté, mais le Cardinal Mazarin, si donc il luy  
plaisoit l'elloigner pour quelque temps nous fe-  
rions voir à ces gens là, comme c'est vostre Ma-  
jesté seule que nous servons, & ne craindrions  
point d'exposer nostre vie pour leur soustenir,  
joint que beaucoup de Gentilshommes qui sont  
retenus par ce reproche se declareroient hardi-  
ment, & il n'y a point d'ennemy si puissant qu'il  
fust, dont vostre Majesté ne vint facilement à  
bout: mais il ne s'en trouue point qui aye assez  
de cœur pour vne telle entreprise, ou qui soit  
assez zelé pour le bien public, n'ayant que leur



interest pour but, & s'imaginant qu'un iour le Cardinal Mazarin obtiendra du Roy pour eux tout ce qu'ils demanderont: en un mot, c'est un heresie d'Estat, qui confond les plus grands Docteurs de la Politique, car ceux de l'armée du Marechal de Turenne, qu'on appelle Mazarins, croyent servir le Roy, & ceux de l'armée de Son Altesse Royale ont le mesme sentiment, le temps seul decidera cette question, cependant Dieu veuille ayder aux mieux intentionnez.

**F I N.**







